

दिनांक 20.12.2024

समय: 18.45 बजे

आकाशवाणी जयपुर-अजमेर

प्रादेशिक समाचार

- जयपुर कने व्ह्या गैस टैंकर हादसा मांय मरण वाळां री तादाद बध र 11 व्ही-14 जणा री हालत गंभीर।
- हादसा मांय मरण वाळां रा पिरवार वाळां अर जख्मी लोगां सारू प्रधानमंत्री अर मुख्यमंत्री राहत राशि देवण रो ऐलाण कीनो।
- जैसलमेर मांय राज्यां रा वित्त मंत्रियां अर आला अहलकारां री प्री-बजट मीटिंग जारी- जीएसटी काउन्सिल री 55वीं बैठक काल।
- विधानसभा रो काम आवता सत्र ऊं पूरी तरह पेपरलेस व्हेला।
- राजस्थान पुलिस अर स्टेट बैंक ऑफ इण्डिया बीचे पुलिस रा सैलेरी पैकेज रा बारा मांय करार करी ज्यो।

000

जयपुर कने भांकरोटा हलका मांय आज संवारे व्ह्या गैस टैंकर हादसा मांय मरण वाळां री तादाद 11 व्हे ग्यी है। आं मांय ऊं 10 जणा री एस.एम.एस अस्पताल अर एक जणा री जयपुरिया अस्पताल मांय मौत व्हे ग्यी। हादसा मांय जख्मी लोगां रो जयपुर रा सवाईमानसिंह अस्पताल मांय ईलाज कर्यो जा रह्यो है। अस्पताल रा अधीक्षक डॉ. सुशील भाटी बतायो के 14 मरीजां री हालत गंभीर है। वे बतायो के हादसा रे कारण भर्ती मरीजां रा ईलाज रा खास इंतजामात करी ज्यो है अर कंट्रोल रूम ई बणायी ज्यो है।

.....  
प्रधानमंत्री नरेन्द्र मोदी मुख्यमंत्री भजनलाल शर्मा सागे फोन रे जरिये बात कर र हादसा रा बारा मांय जाणकारी लीनी। वे केंद्र सरकार री ओर ऊं हरसंभव मदद देवण रो भरोसो दिरायो। प्रधानमंत्री हादसा मांय मरण वाळां रा पिरवार वाळां सारू प्रधानमंत्री राष्ट्रीय राहत कोष ऊं दो-दो लाख अर जख्मी लोगां ने 50-50 हजार रुपया देवण रो ऐलाण कीनो। इण ऊं पैली राज्य सरकार ई हादसा मांय मरण वाळां रा पिरवार वाळां ने 5-5 लाख रुपया अर घणा जख्मी लोगां ने एक-एक लाख रुपया देवण री घोषणा कीनी। उद्योग मंत्री कर्नल राज्यवर्द्धन सिंह राठौड़ एस.एम.एस. अस्पताल पूग र जख्मी लोगां रो हाल-चाल पूछ्यो। वे खबरनवीसां सागे बातचीत करता थकां हादसा रा बारा मांय और जाणकारी दीनी।

.....  
विधानसभा अध्यक्ष वासुदेव देवनानी ई एसएमएस अस्पताल जा र जख्मी लोगां रो हाल-चाल पूछ्यो।

000

जैसलमेर मांय आज राज्यां रा वित्त मंत्रियां अर माली प्रबंधन ऊं जुड़या आला अहलकारां री बजट ऊं पैली री मीटिंग व्हे रही है। वित्त मंत्री निर्मला सीतारमण री सदरत मांय व्हे रही ई मीटिंग मांय राज्यां रा वित्त मंत्री आवता साल 1 फरवरी ने पेश कर्या जावण वाळा केंद्रीय बजट रा बारा मांय वां री राय दे रह्या है। इण मांय वित्त राज्यमंत्री पंकज चौधरी सागे गोआ, हरियाणा, जम्मू-कश्मीर, मेघालय अर ओडीसा रा मुख्यमंत्री, अरुणाचल प्रदेश, बिहार, मध्यप्रदेश, राजस्थान अर तेलंगाना रा उपमुख्यमंत्री, राज्यां रा वित्त मंत्री अर आला अहलकार सिरकत कर रह्या है। श्रीमती सीतारमण काल जैसलमेर मांय जीएसटी काउन्सिल री 55वीं बैठक री सदरत करेला।

000

राज्यपाल हरिभाऊ बागडे कह्यो है के विद्यार्थियां ने तालीम सागे जीवन कौशल ई हासिल करणो चाहिजे। वे आज मुम्बई मांय अखिल भारतीय पश्चिम क्षेत्र कुलपति सम्मेलन मांय बोल रह्या हा। श्री बागडे कुलपतियां ऊं भारत ने ज्ञान महाशक्ति बणावण सारू काम करण बाबत कह्यो। सम्मेलन मांय राजस्थान, महाराष्ट्र, गोवा अर गुजरात रा विश्वविद्यालयां रा कुलपति सिरकत कर रह्या है।

000

मुख्यमंत्री भजनलाल शर्मा आज कोटपूतली-बहरोड़ जिला रा नीमराणा मांय उद्योगपतियां सागे मुलाकात कीनी। **मुख्यमंत्री ने क्षेत्र के विकास के लिए ज्यादा से ज्यादा निवेश का आह्वान किया।** वे काठ का मजरा जा र लारला दिनां देवलोक व्हा ए.एस.आई. सुरेंद्र सिंह ने श्रद्धांजलि दीनी। मुख्यमंत्री वठे एक गैर-सरकारी विश्वविद्यालय रा कार्यक्रम मांय ई सिरकत कीनी।

000

विधानसभा रो नुवा साल मांय सरू व्हेवण वाळो सत्र पूरी तरह डिजिटल व्हेला। विधानसभा अध्यक्ष वासुदेव देवनानी आज खबरनवीसां ने आ जाणकारी दीनी। वे स्पीकर रा तौर ऊं एक साल रा कामकाज रा बारा मांय मीडिया सागे बातचीत कर रह्या हा। देवनानी कह्यो के सदन री कार्यवाही ने डिजिटल बणावण रो काम ई साल रा आखिर ताई पूरो व्हे जावेला। स्पीकर कह्यो के जनवरी 2025 ऊं विधानसभा मांय सगळा काम ऑनलाइन व्हे जावेला अर वन नेशन -वन एप्लीकेशन रा तहत ई-विधान एप्लीकेशन काम ली जावेला।

.....

श्री देवनानी कह्यो के विधानसभा कने बणायी ज्यो कॉन्स्टिट्यूशन क्लब ई जनवरी 2025 ऊं सरू व्हे जावेला।

000

राजस्थान पुलिस अर स्टेट बैंक ऑफ इण्डिया बीचे 'राजस्थान पुलिस सैलेरी पैकेज' रा बारा मांय आज मुख्यमंत्री भजनलाल शर्मा री मौजूदगी मांय करार माथे सही करी ज्यी। करार रा तहत पुलिस रा कर्मचारियां री हादसा मांय मौत व्हे जावण रा हालात मांय वां रा परिवार वाळां ने 1 करोड़ 20 लाख रुपया, हमेशा सारू दिव्यांग व्हे जावण रा हालात मांय 1 करोड़ 10 लाख रुपया अर आंशिक विकलांगता री सूरत मांय 80 लाख रुपया दिया जावेला। पुलिस कर्मचारियां री हवाई हादसा मांय मौत व्हेवण री सूरत मांय वां रा परिवार वाळां ने 2 करोड़ 70 लाख रुपया, प्लास्टिक सर्जरी या बर्न रा मामलां मांय 10 लाख रुपया, एयर एम्बुलेंस सारू 10 लाख रुपया अर एम्बुलेंस री सेवा लेवण सारू 50 हजार रुपया दिया जावेला। ई मौके मुख्यमंत्री कह्यो के राज्य सरकार आवता बगत मांय राजस्थान पुलिस रा कर्मचारियां रा भला सारू और जतन करेला।

000

देश री हिफाजत रे दौरान जान कुर्बान कर देवण वाळा फौज रा जवान जितेंद्र सिंह राजपूत रो आज वां रा गांव दौसा जिला रा गाजीपुर मांय फौजी मान सागे दाग कर दियो ज्यो। वां ने फौजी टुकड़ी गार्ड ऑफ ऑनर दीनो। दाग री बगत दौसा रा जिला कलेक्टर, एस.पी. अर महुआ रा विधायक राजेंद्र मीणा समेत मोटी तादाद मांय जनता मौजूद रही। जितेंद्र सिंह री बीकानेर री महाजन फील्ड फायरिंग रेंज मांय अभ्यास रे दौरान तोप मांय धमाको व्हे जावण रे कारण मौत व्हे गयी ही। गनर जितेंद्र सिंह सागे एक और फौजी री मौत व्हे गयी ही, जद के एक जवान रो ईलाज चाल रह्यो है। झुंझुनू जिला रा बनगोटड़ी खुर्द रा रहवासी बीएसएफ रा जवान राजेश कुमार पूनियां रो ई आज पूरा मान सागे दाग कर दियो ज्यो। लारला कुछ दिनां ऊं मांदा व्हे रह्या राजेश कुमार जयपुर रा एक गैर सरकारी अस्पताल मांय भर्ती हा। वे बुधवार ने देवलोक व्हे गया हा। मुम्बई नाव हादसा मांय जान देवण वाळा नौसेना रा कमांडो महेन्द्र सिंह शेखावत रो आज वां रा पैतृक गांव जूनसिया मांय सरकारी मान सागे दाग **कर दियो ज्यो।** वां री पार्थिव देह ने जयपुर रा सैनिक अस्पताल ऊं रवाना व्हा पाछे न्यारी-न्यारी ठौड़ा पुष्पांजलि अर्पित **करी ज्यी।** ध्यानजोग है के मुम्बई कने समुद्र मांय एक यात्री नाव अर नौसेना री नाव री टक्कर मांय कमांडो महेन्द्र सिंह शेखावत री मौत व्हे गयी ही।

000

राज्य मांय घणखर ठौड़ां पारो थोड़ो चढ्यो है। सब ऊं कम 2 दशमलव 2 डिग्री सेल्सियस न्यूनतम तापमान सीकर जिला रा फतेहपुर मांय दर्ज करी ज्यो। संगरिया मांय 3 दशमलव 3, करौली मांय 3 दशमलव 4, सिरोही मांय 4 दशमलव 7, बीकानेर मांय 4 दशमलव 8 अर नागौर, श्रीगंगानगर अर अलवर मांय 5 डिग्री सेल्सियस न्यूनतम तापमान रिकॉर्ड करी ज्यो। मौसम विभाग आवता 48 घंटां मांय पारो थोड़ो उतरण अर शेखावाटी हलका मांय कठे-कठे शीतलहर चालण रा आसार जताया है।

000

हरियाणा रा पैली वाळा मुख्यमंत्री अर इंडियन नेशनल लोकदल रा आला नेता ओम प्रकाश चौटाला आज देवलोक व्हे गया। 89 साल रा चौटाला ने सांस लेवण मांय परेशानी व्हेवण परां आज संवारे गुरुग्राम रा एक सरकारी अस्पताल मांय भर्ती करायी ज्यो, जठे ईलाज रे दौरान वां री मौत व्हे गयी। ओम प्रकाश चौटाला सात दफा हरियाणा विधानसभा रा सदस्य अर पांच बार हरियाणा रा मुख्यमंत्री रा तौर ऊं सेवा दीनी। राज्यपाल हरिभाऊ बागड़े अर मुख्यमंत्री भजन लाल शर्मा चौटाला रे देवलोक व्हेवण परां दुःख जतायो है।

000

राज्य मांय चाल रह्या सुशासन सप्ताह रा तहत **बारां** ज़िला मांय न्यारी-न्यारी ठौड़ां आज प्रशासन गांव की ओर शिविर लगायी ज्यो। **हनुमानगढ़** मांय जिला कलेक्टर ज़मीं रा झगड़ा ऊं जुड़्या मामला निपटाया। **दौसा** ज़िला री दौसा पंचायत समिति मांय लगायी ज्यो शिविर मांय एसडीम समेत दूजा अहलकार जनता री समस्यावां सुणी अर 80 समस्यावां रो मौके ई निपटारो करी ज्यो। **सांचौर** ज़िला री चितलवाना पंचायत समिति मांय ई आज ज़िला कलेक्टर री मौजूदगी मांय जण सुणवाई करी ज्यो। **डीग** जिला मांय ई आज सुशासन सप्ताह रा तैत शिविर लगायी ज्यो। एक शिविर मांय कृषि विभाग एक किसान ने खेती-बाड़ी सारू मशीन री खरीदी बाबत् 1 लाख 4 हजार रुपया री सब्सिडी दीनी। सुशासन सप्ताह 24 दिसंबर 2024 तांई मनायो जावेला।